

SEJ NĚŠTO ZA WUŠI ZAPISAĆ

čo. 4

- a) sej něšto spomjatkować
- b) z pisakom prawje wobchadžeć njemóć
- c) sej wuši z pisakom wurjedzić

Prawa je wotmołwa **a**.

Sej něšto za wuši zapisać rěka sej to spomjatkować. Rady wužiwa so to w napominanjach druhemu napřečo: To sej za wuši zapisaj! To rěka, zo maš sej něšto (skónčnje) spomjatkować. Husto počahuje so to na zadžerženje, kotrež njeměło so wospjetować.

Takle móžeš to tež prajić

sej něšto spomjatkować_{ip}, sej něšto zaščěpić_p

Připódla prajene:

Podobny wuraz je *sej něšto do hłowy (z)bić*. Wón pak woznamjenja, zo spytamy sej aktiwnje ze wulkim swójskim napinanjom něšto spomjatkować, něšto nawuknyć.

Přikłady z rěčneho korpusa

„To sej za wuši zapisaj!” Hrožo hladaše Handrij mužikej mjezwoči. (Albert Wawrik, Za kerkom wólša. Stare serbske powěšće, Budyšin 1982)

A što nětko mam? Pjaneho muža! Radšo žanoho hač pjaneho! To sebi njech kóžda holca za wuši zapisa. (Michał Nawka, Na běrnach. Powědančka a skicy, Budyšin 1965, 2. nakład 1983)